

Ilinniartitaanermut Ataatsimiititaliami siulittaasup nalunaarutaa

Meeqqeriviit

Ukioq 2026 qaammatit siulliit Qeqqata Kommuniiani meeqqanut sinaakkutit pitsaasut toqqissisimanartullu pilersinnissaanut suliat sulii ukkatarineqarput.

Anguniagalimmik siusinaartumik iliuuseqarnissamut suliniuteqarpoq, angajoqqaanik suleqateqarluarnissaq nukittorsarneqarpoq aammalu meeqqerivimmiit atuarfimmuut ikaarsaarfeqarnissaq sulissutigineqarluni. Aammattaaq sulisunik pikkorissaanerit ilinniarsimasoqalernissaalu ukkatarineqarput kiisalu kommunitsinni assigiinnerusumik neqerooruteqarnissaq anguniarneqarluni.

Ilinniarsimasunik sulisussarsiorneq sulii unammillernartuuvooq, annermik nunaqarfinni minnerusuni. Taamaattumik Nordjobb Perorsaanermillu Ilinniarfik suleqatigalugit ilinniaqqiffiusinnaasunik sulisoqarniarnermullu suliaqartoqarpoq.

Meeqqerivinni pinnguarterfiit nutaat aammalu pitsanngorsaanerit pisariaqartinneqarput. Meeqqerivittaaq aamma aserfatsaaliinnermut nutarsaanermullu sulii pisariaqartitsippoq, annermik Naja Aleqami.

Atuarfeqarfiit

Atuartut atugaannik, ilikkagaqarnissaannik suliatigullu ineriartornissaannik anguniagalimmik ukkataqarneq ingerlavoq.

Atuartitsinerup pitsaassusaa, angajoqqaanik suleqateqarneq, atuarfiillu imminnut suleqatigiinnerat nukittorsarneqarpoq. Massakkullu ukiup atuarfiusup tullianut piareersaatit inaarsarneqarlutik.

Ilinniarsimasunik ilinniartitsisoqarniarneq nunaqarfinnilu atuarfiup pisortaanik inuttassarsiorneq sulii unammillernarpoq.

Kangerlussuarmi atuartut aalaakkaasumik 54-it missaaniipput. Ilinniartitsisunik nutaanik ilinniarsimasunik ukiup atuarfiusoq nutaamiit tallimanik atorfinitsitsisoqarpoq taamaalilluni atuartitsinerup pitsaassusaa nukittorsarnerussalluni. Taamatuttaaq atuareernermit ornittagaq sunngiffimmilu ornittagaq ataatsimoortinneqarput ataatsimik aqutsisulerlugit. Taamaalilluni meeqqanut inuusuttunullu sammisassat ataqatigiinnerusut aalaakkaasullu ingerlalluarnersinnaapput.

MISI

MISI kommunimi meeqqat inuusuttullu pillugit siunnersuinermit aqqutissiuussinermilu pingaarutilimmik sulii inissisimavoq.

Maluginiarnearpoq siunnersorneqarnissamik pisariaqartitsineq annertusiartortoq, kinguneraalu sulianik utaqqisoqartarnera annertusiartortoq. Atorfinitsitsiniarnermit unammillernartoqarsimanera peqqutaalluni Maniitsumi sullissiniarneq killeqarsimavoq.

Suliniutit assigiinngitsut pitsanngorsaannissami ingerlanneqarput. Aasap kingorna naatsorsuutigineqarpoq sulisoqarnikkut aalaakkaanerusumik ingerlasoqalissasoq psykologit siunnersortillu aallartissasut.

MISI-p sulinermit periutsinik malitassanillu ineriartortitsinikuuvooq, iKomet-ilu ingerlanneqarsimavoq Danmarkimiittoq Center for ADHD+ suleqatigalugu angajoqqaanut ingerlatsisimallutik.

Meeqqanullu immikkut pisariaqartitsisunut suliniuteqartoqarpoq Danmarkimeersut oqalunniarnermut tusaaniarnermullu siunnersuisunik suleqateqarsimallutik.

Majoriaq

Majoriaq innuttaasut ilinnialernissamut, sulilernissamut piginnaanngorsaanerimullu suliat sulii ingerlappai.

Inuusuttut suffeqanngitsullu siunnersuineq, aqqutissiineq suliffeqarfinnullu suleqateqarnikku ilinnialernissaannut sulilernissaannulluunniit ikiornissaat ukkatarivaat,

Aammalu atuarfiit, Majoriaq ilinniaqqiffissallu allat ikaarsaarfeqarnissaanut suliniuteqarnissaq sulissutigineqarpoq.

Sunngiffimmi sammisassat

Ukiup siulliup ingerlanerani annertungaatsiartumik Qeqqata Kommunia tamakkerlugu sunngiffimmi, kulturikkut pinaveersaartitsinikkullu pisoqarfiungaatsiarpoq.

Katersugaasiviit, atuakkanik atorniartarfiit, Amisut, Serravillu sammisassanik amerlasuunik ingerlatitsipput atugarissaarnek, ataatsimoornek innuttaasunillu peqataatitsinissaq ukkataralugu. Sisimiuni katersugaasivik inunnik 23.700-eriarluni pulaartoqarsimavoq. Atuakkanillu atorniartarfik atuarfik suleqatigalugu ilikkagaqarfissatut naapeqatigiiffissatullu atorneqartarpoq. Serravik inunnik 230-it missaani atorneqarsimavoq aammalu sunngiffimmi atuartsinermi 140-nik peqataaffigineqarsimalluni. Atuarfinnik, GUX, Taseralik peqatigiiffiillu suleqatigisarpaat.

Sunngiffimmi sammisassat ineriartortinnissaanut ukkataqarneq suli ingerlavoq. Najukkami susasaqartut suleqatigineri annertusarput aammalu kommunitsinni meeqqanut inuusuttunut innuttaasunullu sinaakkutit pitsaasut qulakkeerniarneqarlutik.

Illuutit

Kommunip illuutaannut sammisassaqaarfiinullu unammillernartoqangaatsiarpoq. Nuniaffik Amerlumilu ajutoortoqarnikuuvoq (vandskade) aammalu ukiup aallartinnerani tillinniarnertit annertuut ingerlasimallutik.

Inneruulat ammaqinnikuuvoq utoqqaallu innuttaasut atulerrpaat.

Siunissaq ungasinnerusumut isigaluni illuutinik nutarsaanernut aserfallatsaalinernullu pilersaarusiortoqartariaqarpoq.

Aningaasaqarneq suliniutillu ukkatassat

Ataatsimut aningaasaqarneq missingersuut malillugu ingerlavoq. Akitigulli sammisassallu amerligaluttuinnarneri ilutigalugu aningaasaqarnikkut malitseqartitsinissaq pisariaqartinneqarpoq.

Ataatsimiititaliamiit ukkatarineqartussat pingaarnerit ilaat:

- Sulisunik inuttassarsiuineq sulisoqaannarnissamullu suliniutit
- Pinaveersaartitsinikkut siusinaartumik iliuuseqartumik suliniuteqarneq
- Meeqgerivinniit, atuarfinnut Majoriamullu pitsaasumik ikaarsaarfeqarnissaq
- Sunngiffimmi kulturikkullu sammisassatigut inerisaaneq
- Illuutinik sammisaqarfinnullu aserfallatsaaliineq
- Atuarfiit, suliffeqarfiit nunaqqataasunillu suleqateqarnermik nukittorsaaneq

Qeqqata Kommunia tamakkerlugu sammisassanik neqeroorutaasunik pitsaasunik ataqatigiittunillu ilinniartitaanermut Ataatsimiititaliaq suliaqarnini ingerlatinnassavaa, taamaalilluni meeqqat, inuusuttut inersimasullu ilikkarnissamut ingerlalluarnissamut ineriartornermullu periarfissaqarluassapput.